

کتاب^۷ دانیال

به زبان گیلکی

www.gilakmedia.com

۱۳۹۷ شمسی

حق چاپ محفوظ است. در صورت استفاده از تولیدات،

لطفا نام وبسایت عنوان شود.

دانیال کیتاب

دانیال و اون دوستان بابل میان

۱ سومی سال یهو یاقیم سلطنت کی یهودا پادشا بو، نبوکدنصر* کی بابل پادشا بو، اورشلیم حمله بوکوده و اون محاصره بوکوده. ۲ خوداوند، یهو یاقیم - یهودا اوستان پادشای - چن تا ظرفان موقدس امره کی خودا معبد شین بید، نبوکدنصر دس اسیر بوکوده. نبوکدنصر او ظرفان خو امره بابل سرزمین میان باورده و اوشان خو خودا* خزانه معبد دورون بنه.

۳ بازین پادشا خو خواجهان رئیس کی اون نام آشفناز بو، دستور بده چن نفر شاهزاده و اشرافزاده کی بنی اسرائیل شین بید، اینتخاب بوکونه و باوره. ۴ جوانان، وستی بی عیب و نقص، خوش برو، و یاد گیتن و اسی زیر و زرنگ، دانا و فهیم بیید و بابلی زوان و ادبیات یاد بیگیرید تا بتانید پادشا کاخ دورون خدمت بوکونید. ۵ پادشا فرمان بده هر روز جه خوراک و شرابی کی اون درباریان خوریدی اوشانم بوخورید و بعد آنکی سه سال تعلیم و تربیت بیدهید، اوشان پادشا خدمت ره باورید. ۶ دانیال، حنیا، میشائیل و عزریا جه قبیلہ یهودا اوشان میان ایسه بید. ۷ خواجهان رئیس اوشان ره بابلی نام بنه:

دانیال - بلطشصر،

حنیا - شدراک،

میشائیل - میشک

و عزریا - عبدنغو.

۸ ولی دانیال خو امره تصمیم بیگفته کی دربار خوراک و شراب امره خوره نجست نوکونه. پس آشفناز جا آ کار و اسی ایجازه بخواسته. ۹ خودا، خواجهباشی دیل نرم کوده کی دانیال موحبت و مهربانی بوکونه ۱۰ ولی آشفناز واگردسته دانیال بوگفته: «من پادشا جا ترسم. اون دستور بده شمر خورد و خوراک فادم. اگه بیدینه کی جوانان دیگر جا ضعیفتر ایسید، می سر و اوینه.»

۱۱ پس دانیال او نگهبانی کی آشفناز اون مسئول او چار نفر چاکوده بو، بوگفته: ۱۲ «تو امر کی تی خدمتگوزارانیم ده روز ایمتحان بوکون و فقط حبوبات و آب فادن. ۱۳ بازین امی دیم* جوانان دیگر امره کی دربار خوراک خوریدی موقایسه بوکون و اوطوبی کی صلاح دینی امی امره رفتار بوکون.» ۱۴ اونم قوبیل بوکوده و ده روز میان اوشان ایمتحان بوکوده.

۱۵ ده روز کی بوگذشته، اوشان جوانان دیگر جا کی دربار خوراک خوریدی قشنگتر و سر حالتربوبوسته بید. ۱۶ هن و اسی گوماشته، عوض دربار خوراک و شراب، بازم اوشان حبوبات فاده. ۱۷ خودا اچار تا جوان دانش و درکی جه تومامی ادب و حکمت عطا بوکوده و دانیال فامستن رویایان و خوابان جورواجورم ببخشه.

۱۸ بعد او سه سالی کی پادشا تعیین بوکوده بو، آشفناز تومامی جوانان دربار نبوکدنصر ورجا باورده. ۱۹ پادشا اوشان امره گب بزه. بازین بیده کی دانیال، حنیا، میشائیل و عزریا جه همه تان بهترییدی. پس اوشان دوجین بوکوده کی اون خدمت بوکونید. ۲۰ نبوکدنصر هر سؤالی جه حکمت و فام کی او چارتا جوان جا واورسهیی، اوشان ده برابر بهتر جه تومام جادوگران و افسونگران سرتاسر خو مملکت دانستی ۲۱ و دانیال تا اولی سال کوروش کبیر شاهنشاهی، دربار دورون خدمت کودی.

* ۱:۱ «نبوکدنصر» زوان فارسی دورون «بخت نصر» و زوان پهلوی دورون «بخت خسرو» بینویشته بوبوسته. * ۲:۱ او زمان نبوکدنصر خودای حقیقی ایمان ناشتی. * ۱۳:۱ ینی «صورت»

نبوکدنصر خواب

۲ نبوکدنصر، خو دوومی سال سلطنت دورونی، ایتا خواب بیده کی اون روح و روان، پریشان بوسته و ده نتانسته بوخوسه. ۲ هن و اسی پادشا فرمان بده جادوگران، افسونگران، فالگیران و اُسْطْرا لَیْجی یان* اون ورجا باورید تا بتانید او خوابی کی بیده اون ره تعبیر بوکونید. اوشانم باموید اون ورجا بئسه یید. ۳ پادشا اوشان بوگفته: «ایتا خواب بیدم کی می روح اون فامستن و اسی پریشان». ۴ اُسْطْرا لَیْجی یان خوشان زوان آرامی* امره پادشای بوگفتیدی: «پادشا تا ابد زنده بمانه! هسا بفرمایید چی خوابی بیده ییدی کی شمره تعبیر بوکونیم».

۵ پادشا اوشان بوگفته: «حکم بوکودم کی اگه می خواب و اون تعبیر مَر نیگید، شمر تیکه تیکه بوکونید و شیمی خانه یان فوگردانید. ۶ ولی اگه می خواب و اون تعبیر مَر بیگید، می جا پيله پادشان، پیش کشی یان و پيله ایفتخار فگیریدی. پس مَر بیگید چی خوابی بیدم و اون تعبیر چیه». ۷ اوشان دووارة بوگفتید: «ای پادشا، شیمی خواب امره واگویا بوکونید تا امانم اون تعبیر بوکونیم». ۸ پادشا جواب بده: «معلومه کی شومان فرصت دونبال گردیدی، چونکی دانیدی کی می حکم عوض نیه. ۹ هسا اگه می خواب مَر نیگید، فقط ایتا حکم شمره اجرا به. شومان نقشه بکشه ییدی کی مَر دورغ بیگید و بیخود گبان بزید اومید امره کی شاید اوضاع عوض به. پس می خواب مَره واگویا بوکونید تا من خاطر جم بیم کی تانیدی اون مَره تعبیر بوکونید».

۱۰ اُسْطْرا لَیْجی یان جواب بده ییدی: «ای پادشا، ا جهان دورون کسی نیسه کی بتانه شیمی دستور انجام بده چونکی هیچ پادشایی هر چقدر پيله و قوی بیه ا جور درخواست خو جادوگران، افسونگران و اُسْطْرا لَیْجی یان جا نوکوده. ۱۱ شیمی خواسته اقدر سخته کی هیکس جه غیر خودایان کی آدمان امره زندگی نوکونیدی، نتانه شمر بگه چی خوابی بیده ییدی». ۱۲ اوشان جواب جا، پادشای اقدر غیظ گیفته کی دستور بده توما بابل حکیمان بوکوشید. ۱۳ بازین پادشا فرمان صادر بوبوسته کی اُستی حکیمان بوکوشید. هن و اسی بو کی دانیال و اون رفقا دونبالم گردستیدی تا اوشانم بوکوشید. ۱۴ ولی دانیال خو حکمت و خرد امره پادشا جلادان رئیس امره گب بزه کی اون نام اریوک بو و فرمان داشتی بابل حکیمان بوکوشه ۱۵ و اریوک جا و اُورسه: «چره پادشا اُطو بی رحمی امره دستور بده؟» بازون اون ا پیشامدان دانیال ره تعریف بوکوده. ۱۶ دانیال بوشو پادشا ورجا خواهش بوکوده کی ایتا فرصت بداره خودش او خواب تعبیر بوکونه.

خوداوند نبوکدنصر خواب، دانیال نشان دهه

۱۷ بازین دانیال و اگردسته بخانه و او پیشامدان خو رفقا، حنیا، میسائیل و عزریای بوگفته ۱۸ و اوشان جا بخواسته دوعا بوکونید کی خودای آسمانان رحم بوکونه و اراز اوشان ره آشکار کونه تا دانیال و اون رفقا، بابل دیگر حکیمان امره کوشته نیبید. ۱۹ هو شب رویا میان او راز دانیال ره آشکار بوسته. پس خودای آسمانان ستایش بوکوده و ۲۰ بوگفته:

«خودا نام تا ابد موبارک بیه

کی حکمت و قودرت اون شینه،

۲۱ او کسی کی وختان و فصلان عوض کونه،

پادشایان بر کنار کونه و پادشایان دیگر به سلطنت رسانه،

هونه کی حکیمان حکمت و فهیمان دانایی فاده.

۲۲ خودا، عمیق رازان کی هیکس نانه، آشکار کونه؛

جه اونچی کی ظولمات دورون نهه آگاهه

و نور اون ورجا ساکن ایه.

۲۳ ای خودای امی پئران، تر شوکر و ستایش کونم،

چونکی مَر حکمت و قودرت ببخشه یی.

او چیئی کی امان تی جا بخوآستیم، تو مَر آشکار کودی
و پادشا خواب و اون تعبیر اَمَر نیشان بدیی.»

۲۴ بازین دانیال بوشو آریوک ورجا کی پادشا اون فرمان بدّه بو بابل حکیمان بوکوشه و بوگفته: «بابل حکیمان نوأ
کوشتن. مَر ببر پادشا ورجا تا من اون خواب تعبیر بوکونم.»

۲۵ پس آریوک فوری دانیال برده پادشا ورجا و بوگفته: «ایتا اسیر بیافتم کی یهودا شینه و تانه شیمی خواب تعبیر
بوکونه.» ۲۶ پادشا، دانیال کی اون بلطشصر نام بنه بو، دوخواده و واورسه: «تو تانی می خواب مَر بیگی و اون تعبیر
بوکونی؟» ۲۷ دانیال جواب بدّه: «هیچ حکیم، افسونگر، جادوگر یا طالع بین نتانه رازیئی کی پادشا خوایه، اون ره
تعبیر بوکونه ۲۸ ولی آسمان میانی خودایی ایسه کی رازان آشکار کونه. اون شمر جِه اونچی کی آخر روزان پیش اَمون
دره وَاخبر کوده. هسأ شیمی خواب تعبیر و رویایان کی تخت میان بیدهید اَطویه: ۲۹ ای پادشا، وختی کی شیمی
تختخواب میان بوشو بید، دربارهئی ایفتاقانی کی در آینده دکفه فیکر کودن دیبید و اونی کی رازان آشکار کونه شمر
نیشان بدّه کی چی پیش آیه. ۳۰ ولی آن و اسی مَر آشکار نوبوسته کی می حکمت دیگر آدمان جا ویشتره، بلکی، ای
پادشا، آشکار بوسته تا شومان، شیمی خواب تعبیر بدانید و جِه او چیزی کی شیمی فیکر مشغول کوده وَاخبر بید.

دانیال، پادشا خواب تعبیر کونه

۳۱ «ای پادشا، وختی فندرستن دیبید، ایدفعهیی خودتان ایتا پيله دانه مجسمه جُلو بیافتید کی بی نهایت درخشان و
ترسناک بو. ۳۲ مجسمه سر طلای ناب بو، اون سینه و بازویان نقره بو و اون شکم و اون دوتا ران برنز بو. ۳۳ اون دوتا
ساق آهینی و اون پایان ایپچه آهینی و ایپچه سفالی بو. ۳۴ هطویی کی شومان اون فندرستن دیبید، ایتا پيله دانه سنگ
بکنده بوبوسته ولی نه اینسان دس جا. بازین بوخورده مجسمهئی آهینی و سفالی پایان و اوشان دورسنه. ۳۵ بازین
آهین، سفال، برنز، نقره و طلا همدیگر اَمَره ایجور خورد بوستید کی عین کلوش خرم تاپستان مانستن، باد همهئی
اوشان برده و ده هیچی بجا نمأنسته. ولی او سنگی کی مجسمهئی خورد کوده بو ایتا پيله کوه مانستن بوبوسته کی
تومامیئی دونیای پور کوده.

۳۶ «آن شیمی خواب بو. هسأ شمره اون تعبیر کونم. ۳۷ ای پادشا، شومان شاه شاهانیدی. خودای آسمانان، شمر
سلطنت و ایقتدار و قوت و ایحترام ببخشه. ۳۸ خودا تومام آدمان و صارا جانوران و آسمان پرندهیان، هر جا کی
اوشان ساکنیدی، شیمی دس بیسپرده تا اوشان حکمفرمایی بوکونید. شومان او مجسمه طلایی سر ایسید.

۳۹ «بعد شومان، ایتا سلطنت دیگر ظوهور کونه کی شیمی سلطنت جا بیجیرتره. بازین سیومی سلطنت کی برنز
مانسته بر تومام دنیا حکومت کونه. ۴۰ چارمی سلطنت آهین مانستن قوی به، چونکی آهین همه چیئی نابود کونه
و ایشکنه. هطویی کی آهین همه چیئی خورد کونه، اونم سلطنتان دیگر دورسنه و نابود کونه. ۴۱ هوطو کی شومان
بیدهید کی اون پا و اون پنجه بآنم ایپچه سفالی و ایپچه آهینی بو، هطویم ا سلطنت تقسیم به. ولی هوطویی کی
بیدهید آهین و سفال همدیگر اَمَره مخلوط بوبوسته بید، ایتا پیچه آهین قودرت اون دورون مانه. ۴۲ و هوطو کی اون
پنجهیان ایپچه آهینی و ایپچه سفالی بید، هطویم او سلطنت، ایتا قسمت سفت و محکم و ایتا قسمت ایشکفتنی به.
۴۳ هوطو کی بیدهیدی آهین و سفال همدیگر اَمَره قاطی بوبوسته بید، ا سلطنت دورون مردوم همدیگر اَمَره قاطی
بیدی ولی هطو کی سفال و آهین نتانیدی همدیگر اَمَره ترکیب بیید، اوشانم کس کس اَمَره موحد نیبیدی.

۴۴ «او پادشایان سلطنت دوران، خودای آسمانان، سلطنتی برپا کونه کی هیوخت جِه بین نیشه و هیئا قوم دیگر
دس دنکفه. او پادشایی تومام سلطنتان دیگر دورسنه و نابود کونه ولی خودش تا ابد پایدار مانه. ۴۵ شومان بیدهید
کی چوطویی ایتا تخته سنگ، بدون آنکی کسی اون دس بزنه، کوه جا بکنده بوبوسته و مجسمهئی کی آهین، برنز،
سفال، نقره و طلا جا چاکوده بوبوسته بو خورد کوده. ای پادشا، خودای عظیم شمر جِه اونچی کی بازین ایفاق
دکفه آگاه بوکوده. ا خواب دوروسته و اون تعبیر هنه.»

پادشا دانیال مقام بوجورتری فاده

۴۶ بازین نبوکدنصر پادشا بگفته دانیال پا جیر، اون سوجده بوکوده و دستور بده کی اون ره پیش کشی بأورید و بوخور بوسوجانید. ۴۷ پادشا دانیال بوگفته: «رأس رأسی شیمی خودا، خودای خودایان و پادشایان سروره و هونه کی اسرار نیشان دهه، چونکی تو بتانستی آراز آشکار بوکونی.»

۴۸ بازین پادشا دانیال پيله مقام و ایتا عالمه پیش کشی فاده و اون سرتاسر بابل اوستان حاکم و توما م بابل حکیمان رئیس چاکوده. ۴۹ دانیال پادشا جا خواهش بوکوده کی شدرک، میشک و عبدنغو اوستان بابل میان پيله کاران مملکتی اداره بوکونید و دانیال شاه دربار دورون بئسه.

پادشا دستور دهه طلایی مجسمه ی پرستش بوکونید

۳ نبوکدنصر پادشا ایتا مجسمه، طلا جا چاکوده کی اون درازا ۲۷* متر و اون پهنا ۳ متر بو و اون دشت «دورا» میان کی ولایت بابل دورون نهه بو، بر پا بوکوده. ۲ بازین پادشا دستور بده کی توما م اوستانداران، حاکمان، فرمانداران، مشاوران، خزانه داران، قاضیان، دادرسان و توما م ولایتان صاحب منصبان بأید تا ایتا مراسم میان شرکت بوکونید کی او مراسم میان او مجسمه یی کی پادشا بر پا بوکوده بو، تبرک ببه. ۳ پس اوستانداران، حاکمان، فرمانداران، مشاوران، خزانه داران، قاضیان، دادرسان و توما م ولایتان صاحب منصبان، نبوکدنصر بر پا بوکوده مجسمه تبرک کون و آسی بامویدی و اون جلو به پا بئسه ییدی. ۴ جارچی فریاد بزه: «ای قومان و ای ملتانی کی زوانان جورواجور امره گب زینیدی، دستور گوش بدید! ۵ هطو کی کرنا و نی و تنبور و چنگ و سنتور و دهل صدا و هر جور ساز دیگر نوای بیشتاوستیدی، شومان و طلایی مجسمه جلو کی نبوکدنصر پادشا بر پا بوکوده، زمین سر بکفید و اون پرستش بوکونید. ۶ هر کی زمین سر نکفه و اون پرستش نوکونه، هو وخت آتش تون* دورون تاوده به.»

۷ هن و آسی توما م مردوم هر میل و قوم و زوانی، هطو کی کرنا و نی و تنبور و چنگ و سنتور صدا و هر جور ساز دیگر نوای بیشتاوستیدی، طلایی مجسمه جلو کی نبوکدنصر پادشا بر پا بوکوده بو، زمین سر کفتیدی و اون پرستش کودیدی.

آتش تون

۸ او وخت چن نفر اُسْطُرلابچی بامویدی جلو و یهودیان جا شکایت بوکودیدی. ۹ اوشان نبوکدنصر پادشای بوگفتیدی: «ای پادشا، تا ابد زنده بمانید. ۱۰ مگه شومان دستور ندیدی هر کی کرنا و نی و تنبور و چنگ و سنتور و دهل صدا و هر جور ساز دیگر نوای بیشتاوه، و زمین سر بکفه و مجسمه ی طلایی پرستش بوکونه؟ ۱۱ و هر کی یم کی زمین سر نکفه و پرستش نوکونه، و اُستی اون تاودید آتش تون دورون؟ ۱۲ ولی چن تا یهودی مردای ایسه ییدی، شدرک، میشک و عبدنغو نام، کی شومان بابل پيله کاران مملکتی، اوشان فاده ییدی. ای پادشا، اوشان شمر محل ننه ییدی، شیمی خودایان خدمت نوکونیدی و طلایی مجسمه یی کی بر پا بوکودیدی، پرستش نوکونیدی.»

۱۳ نبوکدنصر خیلی غیظ گرفته و دستور بده کی شدرک، میشک و عبدنغو بأورید. وختی اوشان پادشا ورجا بأوردیدی، ۱۴ پادشا واورسه: «ای شدرک، میشک و عبدنغو، راسته کی می خودایان خدمت نوکودیدی و طلایی مجسمه جلو کی من بر پا بوکودم، پرستش نوکودیدی؟ ۱۵ هسا اگه حاضریدی کی وختی کرنا و نی و تنبور و چنگ و سنتور و دهل صدا و هر جور ساز دیگر نوای بیشتاوستیدی، طلایی مجسمه جلو زمین سر بکفید و اون پرستش بوکونید، کی هیچی. ولی اگه آکار نوکونید، فوری آتش تون دورون تاوده بیدی. بازین دینیمی کویدانه خودا تانه شمر می دس جا نجات بده.»

۱۶ شدرک، میشک و عبدنغو و اگر دستیدی بوگفتیدی: «ای نبوکدنصر پادشا، امان ایحتیاج ناریمی آ مورد و آسی خودمان جا دفاع بوکونیم. ۱۷ اگه امر آتش تون دورون تاودید، خودایی کی اون پرستش کونیمی، تانه امر آتش جا

نجات بدہ و اونہ کی آمر شیمی دس جا رہا کونہ۔ ۱۸ ولی حتی اگہ اون آمر نجات ندہ، آی پادشا، بدأنید کی امان شیمی خودایان پرستش نوکونیمی و او طلائی مجسمہ کی شومان بر پا بوکودیدی، سوجدہ نوکونیم۔
 ۱۹ نبوکدنصر وختی اوشان گبان بشتاوستہ، اون خیلی غیظ گیفتہ و اون آتش گیفتن دوبو۔ دستور بدہ آتش جہ اونچی کی معمول بو، ہفت برابر ویشتر داغ کونید ۲۰ و خو قوی ہیکل سربازان فرمان بدہ کی شدرك، میشک و عبدنغوی دودید و تاودید آتش تون دورون۔ ۲۱ بازین ہر سہ نفر ہوطو کی شلوار و ردا و کلاہ و لیپاسان دیگرم دوکودہ بید، دؤستید و آتش دورون تاودہید۔ ۲۲ پادشا فرمان انقدر سخت بو و آتش انقدر داغ بو کی آتش شوالہیان او کسان کی شدرك، میشک و عبدنغوی بردن دبید تا تاودید آتش دورون، بوسوجانہ و بوکوشتہ۔ ۲۳ او سہ تا مردای، ہوطو کی اوشان دس و پا دؤستہ بو، آتش تون دورون دکفتیدی۔ ۲۴ نبوکدنصر پادشا قاق بوستہ و عجلہ آمرہ جہ خو جا سر ویریشتہ و خو مشاوران واورسہ: «مگہ امان سہ نفر دئوستیم و آتش دورون تئودہیم؟» اوشان جواب بدہید: «دوروستہ، آی پادشا! ۲۵ پادشا بوگفتہ: «بیدیند، من چارتا مرداک دینم کی آتش دورون را شوئون دریدی، در حالی کی اوشان دؤستہ نییدی و اوشان ہیچی نوبوستہ۔ چارمی نفر خودایان پسر مأنہ!»
 ۲۶ بازون نبوکدنصر بوشو آتش دهنہ جلو و بوگفتہ: «شدرك، میشک، عبدنغو کی خودای موتعال خدمت کونیدی، بائید بیرون و آیہ بسید!» هو لحظہ شدرك، میشک و عبدنغو آتش جا بیرون باموید۔
 ۲۷ اوستانداران، حاکمان، فرمانداران و دربار مشاوران جم بوستیدی و بیدہیدی چوطو او سہ نفر بدن آتش نوسوجانہ و نہ اوشان ایتا خال مو بوسوختہ و نہ اوشان لیپاسان و حتی آتش بو اوشان فئرسہ۔
 ۲۸ بازین نبوکدنصر بوگفتہ: «موتبارک ببہ خودای شدرك، میشک و عبدنغو کی خو فرشتہ ای اوسہ کودہ تا خو خادمان نجات بدہ کی اون توکل داریدی و پادشا فرمان بجا ناوردیدی و حاضر بوبوستیدی خوشان جان فادید کی خودای دیگری جز خوشان خودا خدمت و پرستش نوکونید۔ ۲۹ ہسا فرمان دهم ہر کس جہ ہر قوم و زوانی کی ضد خودای شدرك، میشک و عبدنغو گب بزہ، تیکہ تیکہ بوکونید و اون خانہ ای فوگردانید، چونکی خودای دیگری وجود نأرہ کی بتانہ اطوی نجات بدہ۔»
 ۳۰ بازین پادشا، شدرك، میشک و عبدنغوی مقام پیلہتری اوستان بابل میان فادہ۔

نبوکدنصر، خودای ستایش کونہ

۴ جہ نبوکدنصر پادشا بہ تومام قومان و ہمہ ای مردومان کی زمین سر زندگی کونیدی و ہر زوان آمرہ گب زنیدی:
 «سلامتی فراوان بر شومان! ۲ اطلو صلاح بیدم نیشانہیان و معجزہیان کی خودای موتعال مر عطا بوکودہ، شمرہ بگم۔

۳ چی عظیمہ خودا نیشانہیان
 و چی پیلہدانہیہ اون معجزہیان!
 اون پادشایی تا ابد پا بر جا مأنہ
 و اون حکومت نسل اندر نسل۔»

نبوکدنصر دومی خواب

۴ من، نبوکدنصر، می کاخ دورون خیال راحت آمرہ زندگی کودیم و می دیل خوش و خوروم بو ۵ تا انکی ایتا خواب بیدم کی مر بترسانہ۔ ہوطوی کی می تختخواب میان خوفتہ بوم، او رویا فیکران مر سخت بہ وحشت تاودہ۔
 ۶ بازین دستور بدم کی تومامی بابل حکیمان می ورجا باورید تا می خواب تعبیر بوکونید۔ ۷ وختی جادوگران، افسونگران، اسطرلابچی یان و طالع بینان بامویدی، می خواب اوشان رہ تعریف بوکودم ولی نتانستیدی اون مرہ تعبیر بوکونید۔ ۸ آخر سر دانیال، کی می خودا و اسی «بلطشصر» دوخوادہ بہ و خودایان موقدس روح دارہ، می ورجا بامو۔
 می خواب اون رہ تعریف بوکودم و بوگفتم: ۹ «ای بلطشصر، ای جادوگران رئیس، من دانم کی تو خودایان موقدس روح داری و ہیئت راز فامستن ترہ سخت نیہ۔ ان می خوابہ و تی جا خوایم اون مرہ تعبیر بوکونی:

۱۰ «می تختخواب سر رویانی بیدم کی زمین میان ایتا پیلہ دار نہہ. ۱۱ او دار آنقدر تنومند و پیلہ بوستہ کی اون سر آسمان فارسہ، جوری کی تومام دنیا مردومان تانستیدی اون بیدینید. ۱۲ اون ولگان خوشگل بو و آنقدر میوہ داشتی کی ہمہ تان تانستید اون جا بوخوریید. صارا حیوانان اون سایہ جیر ایستراحت کودیدی و آسمان پرندہ یان اون شاخہ سر خوشان رہ فک نییدی و تومام جانوران اون میوہی خوردیدی.

۱۳ «هطو کی می تختخواب میان رویا دشن دوبوم، بیدم کی ایتا نیگہبان موقدس آسمان جا بیجیر بامو. ۱۴ اون فریاد بزه و بوگفتہ: ادخت و اوینید و اون شاخہ یان قطع کونید؛ اون ولگان و اچینید و اون میوہ یان پخش و پلا بوکونید. حیوانان جہ اون سایہ جیر و پرندہ یان اون شاخہ یان جا فراری بدید. ۱۵ ولی اون کوندہ و ریشہ یان آہینی و برنجی زنجیل امرہ ڈوید و بیابان و اشان دورون خاک رو سرا دید. بہ کی آسمان ایاز اون ہیست کونہ و حیوانان امرہ زندگی بوکونہ و علف بوخورہ. ۱۶ بہ کی ہفت دورہ میان، اون اینسانی دیل بہ حیوانی دیل تبدیل بہ. ۱۷ نیگہبانان موقدس ا تصمیم اعلام بوکودیدی و موجودان موقدس ا حوکم تعیین بوکودید تا زندہ یان بدانید کی خودای موعال اینسان حکومتان پادشایی کونہ و ا حکومتان ہر کی اون دیل بخوایہ، بخشہ حتی پست ترین آدمان.

۱۸ «ان بو خوابی کی من نبوکدنصر پادشا بیدم. ہسا، ای بلطشصر، تو ان مرہ تعبیر بوکون، چرہ کی ہیٹا جہ می مملکت حکیمان تانستید ا کار بوکونید. ولی تو تانی، چونکی خودایان قدوس روح داری.»

دانیال، پادشا خواب تعبیر کونہ

۱۹ بازین دانیال کی اون بلطشصرم دوخوایدی، مدتی قاق بوستہ و اون فیکران اون پریشان کودہ. ہن و اسی پادشا دانیال بوگفتہ: «ای بلطشصر، وئال او خواب و اون تعبیر تر پریشان کونہ.» بلطشصر جواب بدہ: «ای سرور، آرزو کونم کی ا خواب شیمی دوشمنان رہ و اون تعبیر شیمی بدخواہان رہ بہ. ۲۰ او داری کی بیدہ بیدی آنقدر پیلہ و قوی بو بوستہ کی اون سر آسمان فارسہ، جوری کی تومام دنیا مردومان تانستید اون بیدینید ۲۱ و اون ولگان خوشگل بو و آنقدر میوہ داشتی کی ہمہ تان تانستید اون جا بوخوریید و صارا حیوانان اون سایہ جیر ایستراحت کودیدی و آسمان پرندہ یان اون شاخہ سر خوشان رہ فک نییدی. ۲۲ ای پادشا، او دار شومان ایسیدی! شومان پیلہ و قوی بو بوستیدی. شیمی عظمت آنقدر زیاد بوستہ کی آسمان فارسہ و شیمی سلطنت تا آخر دنیای بیگفتہ.

۲۳ «ای پادشا، شومان نیگہبان موقدسی بیدہ بیدی کی آسمان جا بیجیر بامو و بوگفتہ: (دار و اوینید و جہ بین برید ولی اون کوندہ و ریشہ یان آہینی و برنجی زنجیل امرہ ڈوید و بیابان و اشان دورون خاک رو سرا دید. بہ کی آسمان ایاز اون ہیست کونہ و ہفت دورہ، جانوران میان زندگی بوکونہ.)

۲۴ «ای پادشا، شیمی خواب تعبیر و دستوری کی خودای موعال شمرہ، ای سرور، تعیین بوکودہ آنہ کی ۲۵ شومان، مردومان جا طرد بید و صارا جک و جانوران امرہ زندگی کونیدی؛ گابان مانستن شمر علف فایدی کی بوخوریید و آسمان ایاز جا ہیست بیدی. ہفت دورہ اطوی گوذرہ تا بفامید کی خودای متعالہ کی اینسان حکومتان پادشایی کونہ و او شان ہر کی اون دیل بخوایہ بخشہ. ۲۶ نیگہبان موقدس بوگفتہ کی دار کوندہ و اون ریشہ یان زمین سر بنید. اون معنی آنہ کی وختی شومان بفامستیدی کی خودایہ کی حکومت کونہ، ہو موقع شیمی پادشایی دووارہ واگردہ. ۲۷ پس ای پادشا، می نصیحت شمر خوش باہیہ: خوروم کاران امرہ شیمی گونایان جا دس بکشید و عوض شیمی خطایان، فقیران مہربانی بوکونید بلکی اطوی شیمی سعادت ایدامہ پیدا بوکونہ.»

نبوکدنصر خواب حقیقت پیدا کونہ

۲۸ تومام ابلیان نبوکدنصر پادشا سر بامو. ۲۹ دوازده ماہ کی پادشا خواب جا بوگوذشتہ، ایتا روز هطو کی اون، بابل کاخ پشت بام سر قدم زنن دوبو، ۳۰ بوگفتہ: «بیدینید مگہ ان پیلہ دانہ بابلی نی یہ کی می توانایی و قودرت امرہ می جلال و شکوہ و اسی چاکودم تا می سلطنت جاجیگا بہ؟»

۳۱ اون گب ہنوز تومام نوبوستہ بو کی ایتا صدا آسمان جا بامو کی بوگفتہ: «ای نبوکدنصر پادشا، ان بدان کی حکومت تی جا فیگفتہ بو بوستہ. ۳۲ شومان مردومان جا طرد بید و صارا دورونی جک و جانوران امرہ زندگی کونیدی؛ گابان مانستن شمر علف فایدی کی بوخوریید. ہفت دورہ اطوی گوذرہ تا بفامید کی خودای متعالہ کی اینسان حکومتان پادشایی کونہ و او شان ہر کی اون دیل بخوایہ بخشہ.»

۳۳ ایدفعہیی او گبان نبوکدنصر رہ ایتفاق دکفته و اون جہ مردومان میان بیرون تاودہیید۔ گابان مأنستن علف خوردی و آسمان ایاز اون بدن هیست کودی تا اون مویان، عقاب پران مأنستن دراز بوستیدی و اون ناخونان پرندہیان چنگلان مأنستن بوبوستہ۔

نبوکدنصر حال خُب بہ

۳۴ بازین کی آروزان تومام بوستہ، من، نبوکدنصر، می چومان مرہ آسمان فندرستم و می عقل، مر واگردستہ۔ هو موقع خودای موتعال موتبارک دوخوادم و اون کی تا ابد زندہیہ ستایش و پرستش بوکودم، چرہ کی اون حکومت تا ابد پا بر جا مأنہ و اون پادشایی نسل اندر نسل ایدامہ دارہ۔

۳۵ تومام مردومانی کی زیمین سر زندگی کونیدی ہیچ بحیساب نأییدی و اون خو ایرادہ آمرہ آسمانی لشکران میان و تومام مردومان میان کی زیمین سر زندگی کونیدی، عمل کونہ۔

ہیکس نتانہ اون جولوی بیگیرہ
یا اون جا واورسہ: «چی بوکودی؟»

۳۶ هو وخت می عقل مر واگردستہ و می عظمت و شکوہ می سلطنت جلال و آسی دووارہ مر فادہ بوبوستہ۔ می مشاوران و پیلہ کسان می دونبال بگردستیدی و دووارہ می تخت سلطنت سر بینیشتم و می جلال و شکوہ جہ قبل ویشتر بوستہ۔ ۳۷ ہسأ من، نبوکدنصر، آسمانان پادشای ستایش کونم، اون حمد و سپاس گم و اون جلال دہم، چرہ کی اون تومام کاران، حق و اون تومام رایان، عیدالته۔ اون تانہ کسانئی کی غورز آمرہ رفتار کونیدی ذلیل و خوار کونہ۔

ایتا دس نیویشته دیواژ سر

۵ بِلَشَصَّر کی پادشا بو ہزار نفر جہ خو پیلہ آدمان رہ ایتا پیلہدانہ مہمانی بر پا بوکودہ و اوشان آمرہ شراب بوخوردہ۔ ۲ اون پیلہ پتر*، نبوکدنصر پادشا، اورشلیم معبد جا جامان طلا و نقرہ اوسادہ بو۔ بِلَشَصَّر ھطویی کی شراب خوردن دوبو، دستور بدہ او جامان باورید تا خودش و اون پیلہ آدمان، زناکان و حرمسرا زناکان اوشان دورون شراب بوخورد۔ ۳ پس او طلایی جامان باوردیدی کی اورشلیم معبد جا اوسادہ بوبوستہ بید و پادشا، اون پیلہ آدمان، اون زناکان و حرمسرا زناکان اوشان دورون شراب بوخوردیدی۔ ۴ ھطویی کی شراب خوردن دیبید، خودایانی کی طلا، نقرہ، برنز، آہین، چوب و سنگ جا بید، ستایش کوردیدی۔ ۵ پادشا قصر دورون، دیواژ گچ سر چراغدان روبرو، ایدفعہیی ایتا اینسان دس پنجہ ظاہیر بوستہ۔ وختی پادشا او دس بیدہ کی نیویشتن دوبو، ۶ اون رنگ و رو بپرستہ و آنقدر بترسہ کی اون پایان سوست بوستیدی و اون زانویان آنقدر پرکستیدی کی بہ ہم خوردیدی۔ ۷ فریاد بزہ کی تومام افسونگران و اُسطلابچی یان و طالع بینان باورید و اون، بابل حکیمان بوگفتہ: «ہر کی بتانہ آبینیویشتهی بخوانہ و مرہ تعبیر بوکونہ، دستور دہم ارغوانی ردای اون دوکونید و طوق طلا اون گردن تاودید، بازون اون سیومی حاکم مملکت بہ۔»

۸ تومام پادشا حکیمان بامویدی ولی ہیکس نتانستہ او بینیویشتهی بخوانہ و پادشا رہ معنی بوکونہ۔ ۹ پس بِلَشَصَّر پادشا خیلی پریشان بوستہ و اون رنگ و رو بپرستہ و تومام پیلہ آدمان دیل نیگران بوستیدی۔

۱۰ وختی شہبانو*، پادشا و پیلہ آدمان گبان بیشتاوستہ، مہمانی تالار دورون بامو و بوگفتہ: «پادشا تا ابد زندہ بمأنہ۔ آنقدر دیل نیگران نوأ بوستن کی تی رنگ و رو بپرہ۔ ۱۱ تی مملکت دورون ایتا مردای ایسہ کی موقدس خودایان روح دارہ۔ تی پتر سلطنت موقع، بینش، ہوش و حکمتی کی خودایان حکمت مأنستن بو، اون دورون وجود داشتی۔ نبوکدنصر پادشا، تی پتر، اون جادوگران، افسونگران، اُسطلابچی یان و طالع بینان رئیس چاکودہ، ۱۲ چرہ کی اون ایتا ذہن عالی داشتی و حکیم و دانا بو و تانستی خوابان تعبیر بوکونہ، معمایان حل بوکونہ و پیلہ موشکلان رہ چارہ

* ۲:۵ بِلَشَصَّر، نبونعید پسر بو و احتمالاً نبونعید، نبوکدنصر دُختَر آمرہ ایزدواج بوکودہ بو۔ * ۱۰:۵ ایحتمال دارہ کی اون، نبوکدنصر زن بوبوستہ بی کی بِلَشَصَّر نَنہ بوستی۔

بیافہ. اون دانیال نام داشتی تا کی پادشا اون بَلْطَشَصَّر نام بنه. فرمان بده کی اون باورید تا آ دس نیویشتهی تره معنی بوکونه.»

دانیال، دیواژ سز دس نیویشتهی معنی کونه

۱۳ دانیال باوردیدی پادشا ورجا. بازین پادشا دانیال واورسه: «تو هو دانیالی ایسی کی می پيله پئر تر یهودا سرزیمین جا باورده آیه اسیری؟ ۱۴ بیشتاوستم خودایان روح داری و بینش، هوش و حکمت خاصی داری. ۱۵ حکیمان و افسونگران باوردیدی می ورجا کی آ بینویشتهی مره بخوانید و معنی بوکونید ولی اوشان نتانستیدی آ کار بوکونید. ۱۶ بیشتاوستم کی تو تانی رازان تعبیر بوکونی و پيله موشکلاان ره چاره بیافی. هسا اگه بتانی آ بینویشتهی بخوانی و اون معنی بوکونی، بازین تانی ارغوانی ردای دوکونی، طلایی طوق تی گردن تاودی و سیومی حاکم مملکت بیی.» ۱۷ دانیال، پادشای بوگفته: «شیمی پیش کشی شمره بمانه یا اینفر دیگر فاید، ولی من او نیویشتهی شمره خوانم و اون معنی کونم. ۱۸ ای پادشا، خودای موعال، شیمی پئر نبوکدنصر، سلطنت، عظمت، شکوه و جلال ببخشه بو. ۱۹ آ پيله مقام و اسی کی خودا اون فاده بو، مردومان جه تومام میلتن، قومان و زوانان اون جا ترس و وحشت داشتیدی. شیمی پئر تانستی هر کی کی اون دیل خواستی، کوشتی و یا اون زنده وهشتی؛ هر کی کی خواستی سر بولند کودی ویا اون پست کودی. ۲۰ ولی غرور و تکبر اون بیگفته، هن و اسی تخت سلطنت جا بیجیر باورده بوبوسته و جلال اون جا فیگفته بوبوسته. ۲۱ بازین مردومان جا طرد بوسته، خو دیل دورون جانوران مانستن بوبوسته، وحشی اولاغان امره زندگی بوکوده، گابان مانستن اون علف فاده ییدی کی بوخوره و آسمان ایاز جا هیست بوسته تا زمانی کی بفامسته خودای متعاله کی اینسان حکومتان پادشایی کونه و هر کی کی اون دیل بخوایه، به سلطنت رسانه. ۲۲ «هسا شومان، ای بَلْشَصَّر کی اون زای ایسیدی، همه ای اشان دانستیدی ولی شمر فروتن نوکودید. ۲۳ شومان ضد خوداوند آسمانان، خودتان بوجور بیردید و اون خانه ظرفان شمره باوردیدی آیه و شیمی پيله آدامان، زناکان و حرمسرا زناکان امره اوشان دورون شراب بوخوردیدی و خودایان طلایی، نقره یی، برنزی، آهنی، چوبی و سنگی کی نه دینیدی، نه ایشتاویدی و نه فامیدی، پرستش بوکودیدی. ولی خودای کی شیمی نفس و کاران اون دس دورون نهه، ایحترام ننه ییدی. ۲۴ هن و اسی خودا او دس اوسه کوده تا آ کلمه یان بینویسه. ۲۵ آ بینویشته انه: (مینه، مینه، ثقیل و پرسین) ۲۶ و اون معنی انه: (مینه) ینی کی خودا شیمی پادشایی روزان بشمرده و به آخر فارسانه. ۲۷ (ثقیل) ینی خودا شمر خو ترازو امره بکشه و کم باوردید. ۲۸ (پرس) ینی شیمی پادشایی تقسیم به و مادان و پارسان ببخشه به.»

۲۹ بازین بَلْشَصَّر فرمان بده دانیال ارغوانی ردا دوکونید، طلایی طوق اون گردن تاوید و اعلام بوکونید کی اون، سیومی حاکم مملکت بوبوسته. ۳۰ هو شب بَلْشَصَّر، پادشای کلدانیان، بوکوشته بوبوسته ۳۱ و داریوش کی قوم ماد جا بو و دور و بر شصت و دو سال داشتی، به سلطنت فارسه.

دانیال، شیران چاه دورون

۶ داریوش صلاح بدانسته کی صد و بیست تا اوستاندار تومام خو مملکت ره تعیین بوکونه ۲ و سه تا وزیرم اینتخاب بوکوده کی اوشان نظارت بوکونید کی دانیال ایتا جه اوشان بو. پادشا دستور بده کی تومام اوستانداران و اوستی او وزیران حساب کیتاب پس بدید تا پادشا ضرر و زانی نیدینه. ۳ پادشا خواستی دانیال تومام خو مملکت چاکونه چونکی الباقی وزیران و استانداران جا باهوشتر و داناتر بو. ۴ هن و اسی وزیران و اوستانداران بهانه دونبال گردستیدی کی دانیال حکومتی کاران و اسی اون جا شکایت بوکونید ولی نتانستیدی هیچ بهانه یی جور کونید کی اون محکوم بوکونید چونکی دانیال امین بو و هیچ خطا یا ایشتابی اون جا سر نزهی. ۵ پس همدیگر بوگفتیدی: «هیوخت نتانیم دانیال متهم کودن و اسی هیچ عیب و ایرادی بیافیم، مگه آنکی ایتا ایراد اون خودا شریعت دورونی و امجیم.»

۶ بازین وزیران و اوستانداران همدیگر آمره بوشویدی پادشا ورجا و بوگفتیدی: «داریوش پادشا تا ابد زنده بمأنه. ۷ امان، توما و وزیران، حاکمان، اوستانداران، مشاوران و فرمانداران همدیگر آمره مشورت بوکودیم و صلاح بیدهیم کی پادشا ایتا حوکم بده و قدغن بوکونه کی هر کس سی روز آینده میان جِه خودا یا اینسانی جغیر شومان، ای پادشا، درخواستی بوکونه، شیران چاه دورون تاوَدَه به. ۸ ای پادشا، هسا دستور بدید ا حوکم بینویشته به و اون مَهر بوکونید تا اَطویی مادان و پارسان قانون میان جِه بین نیشه و تغییر نوکونه.» ۹ داریوش پادشا دستور بده او حوکم بینوینسید و اون مَهر بوکوده.

۱۰ وختی دانیال بیشتاوسته کی او حوکم مَهر بوبوسته، فارسه بخانه و بوشو خو بالاخانه کی اون پنجره یان اورشلیم طرف واز بوستی، چونکی همه تا روز عادت داشتی هویه سه وار زانو بزنه و خودا حوضور دوعا و ستایش بوکونه. ۱۱ وختی او مرداگان همدیگر آمره بامویدی، بیدهیدی کی دانیال خو خودا ورجا دوعا کودن دره و کومک درخواست کودن دره. ۱۲ هَن و اسی بوشویدی پادشا ورجا و اون حکم و اسی پادشا آمره گب بزهیدی: «ای پادشا، مگه شومان شیمی حوکم مَهر نوکودید کی هر کی اسی روز میان جِه خودا یا هر اینسانی جغیر شومان، ای پادشا، درخواست بوکونه، شیران چاه دورون تاوَدَه به؟» پادشا بوگفته: «به قانون مادان و پارسان، فرمان جِه بین نیشه و پا بر جا مأنه.» ۱۳ اوشان، پادشای بوگفتیدی: «دانیال، کی جِه یهودی اسیران ایشه، ای پادشا، شمر اطاعت نوکونه و شیمی حوکم کی مَهر بوبوسته بو، پشت گوش تاوَدَه. اون همه تا روز سه دَفَه دوعا کونه.» ۱۴ پادشا وختی ا گبان بیشتاوسته، اون خیلی غیظ گیفته و تصمیم بیگیفته کی دانیال نجات بده و تا غروب اون نجات و اسی تقلا کودی.

۱۵ بازین او مرداگان دوواره همدیگر آمره بوشویدی پادشا ورجا و بوگفتیدی: «ای پادشا، دانیدی کی مادان و پارسان قوانین اَطویی ایشه کی هر حکمی یا دستوری کی پادشا صادر بوکونه، عوض نیبه.» ۱۶ هَن و اسی پادشا فرمان آمره دانیال باوردیدی و تاوَدَه یید شیران چاه دورون. پادشا دانیال بوگفته: «به تی خودا کی اون همیشه پرستش کونی، تر نجات بده.»

۱۷ ایتا پيله سنگم باوردیدی بنهیدی چاه دهنه سر و پادشا خو انگوشتی و خو امیران انگوشتان آمره چاه دهنه مَهر و موم بوکوده تا دانیال وضع و اوضاع عوض نبه. ۱۸ بازین پادشا و اگر دسته بوشو خو قصر دورون، توما شب هیچی نوخورده و هیچ خوشگذرانی بی اون ره فراهم نوکودید و نتانسته بوخوسه.

۱۹ خروس خوان پادشا ویریزه و عجله آمره شه شیران چاه سر. ۲۰ وختی چاه سر فارسه، ناله آمره دانیال دوخوانه و اون جا واورسه: «ای دانیال، خادم خودای زنده، تی خودا کی تو اون همیشه پرستش کونی بتانسته تر شیران جا نجات بده؟»

۲۱ دانیال جواب بده: «پادشا تا ابد زنده بمأنه! ۲۲ می خودا خو فرشته ای اوسه کوده کی شیران دهن دَوَدَه تا مر زخمی نوکونید، چون خودا ورجا بی گناه بوم و هطویم، ای پادشا، شیمی ورجا، هی ذره ایشتا نوکودم.» ۲۳ پادشا خیلی خوشحال بوسته و فرمان بده دانیال چاه جا بیرون باورید. وختی ا کار بوکودیدی، بیدهید دانیال هی ذره صدمه نیده، چونکی خو خودای توکل بوکوده بو.

۲۴ پادشا دستور آمره توما کسان کی دانیال ایفترا بزه یید، باوردید و اوشان زن و زاکان آمره شیران چاه دورون تاوَدَه یید. اوشان چاه تان فئرسه بید کی شیران اوشان فترکستیدی و توما اوشان خاشان بشکنهیدی. ۲۵ بازین داریوش پادشا به توما میلان و قومان و زوانانی کی توما می زیمین دورون زندگی کودید اَطویی بینویشته: «سلامتی فراوان بر شومان! ۲۶ فرمان دهم کی توما مردومان سرتاسر می پادشایی و دانیال خودا جَلو ترسان و لرزان بیید!»

چونکی اون خودای زنده

و ابدی ایشه.

اون پادشایی نابود نیبه

و اون قودرت پایانی ناره.

۲۷ اونه کی نجات دهه و آزاد کونه.

آسمان و زیمین سر

نیشانه یان و معجزه یان انجام دهه.

اون، دانیال شیران چنگال جا نجات بده.

۲۸ هَن و اسی دانیال، داریوش و کوروش پارسی سلطنت میان موفق بو.

دانیال خواب دورون چارټا جانور دینه

۷ اؤلی سال پلشصر سلطنت کی بابل پادشا بو کی رختخواب میان، دانیال سر جا رویاانی بوگذشته و ایتا خواب بیده. بآزین خو خواب خولاصه ای طوبی بینویشته ۲ و بوگفته: «شب خواب بیدم کی باد جه آسمان چار طرف پيله دریای کولاک بوکودید. ۳ چارټا پيله دانه جانور کی جورواجور بید دریا جا بیرون باموید. ۴ اؤلی شیر نر مانستن بو کی عقاب پر و بال داشتی. هطو کی فندرستن دوبوم، اون پر و بال بکنده بوبوسته و اون زمین جا ویریزانه ییدی و آدمان مانستن اون دوتا پایان سر به پا بدأشتیدی و اینسان دیل اون فاده بوبوسته.

۵ «دومی جانور بیدم کی خرس مانستن بو. اون ایتا شانه بوجور، ایتا شانه بیجیر ایچه راست بوسته و سه تا دنده خاشان به گاز داشتی. ایتا صدا اون بوگفته: (ویریز، هر چی تانی گوشت بوخور).

۶ «بآزین سومی جانور بیدم کی پلنگ مانستن بو. خو پوشت سر، چارټا بال داشتی کی اون بالان پرنده بالان مانستن بو. اون چارټا سر داشتی و حکومت اون فاده بوبوسته.

۷ «بآزین می رویا دورون چارمی جانور بیدم کی وحشتناک و ترسناک و پور قوت بو. پيله گازانی آهین جا داشتی و همه چی فورستی و خورد کودی. هرچی کی بمانسته بو، خو پا جیر لقد مال کودی. او جانور الباقی جانوران امره فرق کودی. اون ده تا شاخ داشتی.

۸ «هوطو کی اون شاخان فندرستن دوبوم، بیدم ایتا کوجه دانه شاخ اوشان میان بوجور امون دره کی او سه تا شاخان قبلای بیخ جا بکنده. آ شاخ، چومانی اینسان چومان مانستن داشتی و دهنی کی پيله پيله گب زهی.

۹ «هطوی کی چیزان دئن دوبوم،

تختانی به پا بوبوسته

و (قدیم الایام) * خو تخت رو بینیشته.

اون لیاسان ورف مانستن سیفید

و اون سر مو پشم پاک مانستن بو.

اون تخت جا شواله آتش ویریشتی

و اون چرخان جا آتش ول زهی.

۱۰ ایتا روخان آتش جا

اون جلو دوارستی.

هیزار هیزار نفر اون خدمت کودیدی

و ده هیزار ده هیزار اون جلو به پا ایسه بید.

محاکمه به پا بوبوسته

و داوری دفتران و بوبوسته.

۱۱ «بآزین چونکی آ شاخ پيله پيله گبان زهی، هطو فندرستن دوبوم. فندرستن دوبوم تا او جانور بوکوشته بوبوسته و اون جسد نابود بوسته و آتش سوزان دورون تاوده یید. ۱۲ ایقتدار جه الباقی او جانوران فیگفته بوبوسته ولی ایجازه داشتیدی ایتا مدت زنده بمانید.

۱۳ «او شب می خواب میان اینفر بیدم کی اینسان پسر مانستن بو و آسمان ابران رو امون دوبو. وختی فارسه، اون (قدیم الایام) حوضر بریدیدی ۱۴ و ایقتدار و جلال و قودرت پادشایی اون فاده بوبوسته تا مردومان، جه تومام میلتن، قومان و زوانان اون خدمت بوکونید. اون قودرت جه بین نیشه و اون پادشایی هیوخت نابود نیبه.

دانیال خواب تعبیر

۱۵ «من، دانیال می روح پریشان بوسته و رویایی کی می سر جا بوگذشته مر بترسانه. ۱۶ بوشوم ایتا جه اوشانی کی اویه ایسه بو نزدیک بوستم و حقیقت تومام آ چیزان اون جا واورسم. بآزین اون می خواب تعبیر بوکوده و

اَطوبی بوگفته: ۱۷ (او چارتا پیلہ جانور، چار پادشایی ایسید کی زمین سر حکومت کونیدی. ۱۸ ولی خودای موعال موقدسان پادشایی فیگیری و تا ابدالاباد خوشان دس داریدی.)

۱۹ «بازین اون جا واورسم: (او چارمی جانور مفہوم چیسہ کی الباقی جانوران امرہ فرق کودی و خیلی ترسناک بو و گازانی آہین جا و چنگال برنزی داشتی و ہمہ چی فوری و خورد کودی و اونچی کی بمأنستہ بو خو پا جیر پامال کودی.) ۲۰ بازین واورسم: (او دہتا شاخی کی اون سر جور نہہ بو مفہوم چیسہ، ہطویم او ایتا شاخ کی ظاہیر بوستہ بو و اون جلو سہتا شاخ دیگر بکفتید، ینی او شاخی کی چومان داشتی و پیلہ پیلہ گبان زہیی و پیلہ تر جہ جانوران دیگر بو.) ۲۱ ہطویمی کی دتن دوبوم، او شاخ خودا موقدسان امرہ جنگستی و اوشان پیروز بوستی ۲۲ تا وختی کی (قدیم الایام) بامو و داوری بہ نفع او موعال موقدسان اجرا بو بوستہ. بازین زمانی فارسہ کی پادشایی بہ دس گیفیدی.

۲۳ «اون مر بوگفته: (چارمی جانور، چارمی حکومتی ایسہ کی زمین سر بہ پا بہ. اون، پادشایی یان دیگر امرہ فرق دارہ و تومام زمین فورہ، پامال و خورد کونہ. ۲۴ دہتا شاخ، او دہتا پادشا ایسیدی کی اسلطنٹ جا ویریزی. بازین ایتا پادشای دیگر بہ سلطنت فارسہ کی پادشایان قبلہ امرہ فرق دارہ و سہتا پادشای شکست دہہ. ۲۵ اون، ضد خودای موعال گب زنہ و خودا موقدسان آزار رسانہ و سعی کونہ ہم وختانی کی تعین بو بوستہ و ہم شریعت و اگر دانہ. اوشان ای زمان، چن زمان و نیم زمان* اون دس دورون تسلیم بیدی.

۲۶ «(ولی محاکمہ بہ پا بہ و حکومت تا ابد او پادشا جا فیکفیتہ و نابود بہ. ۲۷ سلطنت، قودرت و عظمت جہ پادشایی یانی کی تومام آسمان جیر حکومت کونیدی فیکفیتہ بہ و خودای موعال موقدسان فادہ بہ. خودا پادشایی تا ابد ایدامہ پیدا کونہ و تومام حاکمان خودای پرستش و ایطاعت کونیدی.)

۲۸ «هن بو خوابی کی من بیدم. من، دانیال، می فیکران جا خیلی پریشان بوستم و می رنگ و رو بیرستہ ولی می خواب ہیکس نوگفتم.»

دانیال دومی خواب: قوچ و بوز

۱ بِلشَصَّر سلطنت سیومی سال دورون، من دانیال، بعد او اولی رویا کی مر آشکار بوستہ بو، ایتا رویای دیگر بیدم. ۲ می رویا میان بیدم کی شوش قلعه میان، اوستان عیلام* دورون، اون روخان کنار ایسم کی «اولای» نام دارہ. ۳ ہطویمی کی فندرستیم، ایدفعہیی روخان کنار ایتا قوچ بیدم کی دوتا دراژ شاخ داشتی و اون کی درازتر بو دترتر بیرون بامو. ۴ بیدم او قوچ مغرب، شومال و جنوب طرف شاخ زہیی و ہیچ جانوری نتانستی اون جلو بئسہ و ہیکس نیسہ بو کی بتانہ کس جہ اون دس جیویزانہ. ہرچی اون دیل خواستی کودی و قویتر بوستی.

۵ ہوطویمی کی او رویای فیکر کودن دوبوم، ایدفعہیی بیدم ایتا نر بوز، غرب طرف جا آشکار بوستہ و اونقدر توند تاخت زہیی کی اون پا زمین لمس نوکودی. او نر بوز خو دوتا چومان میان ایتا شاخ داشتی کی خیلی چوم دکف* بو. ۶ اون خو خشم و قودرت امرہ بوڈوستہ بوشو او قوچ دو شاخ طرف کی روخان کنار بیدہ بوم. ۷ بازین بیدم کی غیظ امرہ او قوچ حملہ بوکودہ و اون کلہ بزہ و اون دوتا شاخ بشکنہ. او قوچ دہ جان ناشتی اون جلو بئسہ. پس بوز اون تاودہ زمین سر و لقد مال بوکودہ. ہیکسم نتانستی او قوچ اون دس جا نجات بدہ. ۸ او نر بوز قویتر بوستہ ولی وختی کی اون قوت ویشتر بوستہ، اون پیلہ دانہ شاخ بشکفتہ و چارتا چوم دکف شاخ دیگر اون جا سر، بہ سمت چار طرف بادان آسمان بوجور بامو.

۹ ایتا جہ او چارتا شاخان جا ایتا کوجہ شاخ بوجور بامو کی جنوب و شرق و قشنگ سرزمین* طرف رشت بوکودہ. ۱۰ و انقدر قوی بو بوستہ کی آسمان لشکر فارسہ و چن تا آسمان لشکر و چن تا ستارہ یان تاودہ زمین سر و پامال کودہ. ۱۱ اون انقدر قوی بو کی بتانستہ ضد «سردار لشکر آسمانی» ویریزہ و وناشتہ کی خودا رہ ہر روز قوربانی فادید و معبد موقدس حورمت بشکنہ بیدی. ۱۲ نافرمانی و اسی، آسمان لشکر، قوربانی ہمیشگی امرہ، او شاخ فادہ بو بوستہ. او شاخ حقیقت خو پا جیر بنہ و ہر کاری کی بوکودہ موفق بو بوستہ.

* ۲۵:۷ بعضی جہ متخصصان معتقد ایسید کی اصطلاح «ای زمان، چن زمان و نیم زمان» ینی سہ سال و نیم. * ۲:۸ اوستان «ایلام» کیتاب موقدس عبری دورون «عیلام» بینیوشتہ بو بوستہ. قدیم زمانان «عیلام» ایتا اوستان بو، حدود شوش کی خوزستان دورون نہہ. * ۵:۸ ینی «چشمگیر» * ۹:۸ ینی «ایسرائیل سرزمین» * ۱۱:۸ کلمہیی کی متن اصلی دورون بینیوشتہ بو بوستہ معنی «بی حورمت کودن» دارہ ولی تانہ «سراکونا کودن» ہم بہہ.

۱۳ بازین بیشتاؤستم کی دوتا موقدس فرشته کس کس امره گب زنن دیبید، ایتا اویتا جا واورسه: «تا کی طول کشه تا قوربانیاں روزانه تقدیم ببه و او گونایان ایدامه دأره و آسمانی لشکر و پيله معبد پامال به؟» ۱۴ اویتا فرشته بوگفته: «۲۳۰۰ صُب و شب طول کشه و بازین او معبد دوواره تقدیس به.»

دانیال خواب تعبیر

۱۵ وختی من، دانیال، آرویای بیدم و تلاش کودیم کی اون تعبیر بفامم، ایدفعه یی اینفر اینسان مأنستن بیدم کی می جُلُو به پا ایسه بو ۱۶ و اینفر صدای، جه اولای روخان میان بیشتاؤستم کی فریاد بزه و بوگفته: «آی جبرئیل، آ مرداک خواب اون ره تعبیر بوکون!»

۱۷ پس جبرائیل او جایی کی من ایسه بوم نزدیک بوسته و چون بامو جُلُو بترسَم و دمر بکفتم زیمین سر ولی اون مر بوگفته: «آی کسی کی جه نسل اینسان ایسی،* آرویا زمان آخر شینه.» ۱۸ هوطویی کی می امره گب زنن دوبو، دمر زیمین سر کفته بوم و سنگین و آخاب شوم. اون مر دس بزه، ویریزانه و به پا بدأشته ۱۹ و بوگفته: «بیدین، من باموم کی تر جه هر چی کی خشم آخر زمان دورون ایتفاق دکفه، و آخبر کونم، چونکی تی رویا، آخر زمان نیشان دهه. ۲۰ او قوچ دو شاخی کی بیده یی نیشانه یی مادان و پارسان پادشایان ایسه. ۲۱ او نر بوز کی مویان زیادی داشتی، یونان پادشاهه و او دراز شاخ کی اون چومان وسط نهه بو اولی پادشاهه. ۲۲ او چارتا شاخ کی او بشکفته شاخ جا سر بوجور باموید، چارتا سلطنتانی ایسیدی کی اون قوم جا ویریزیدی ولی هیتا، اولی مأنستن پور قوت نیبیدی.

۲۳ «آخر اوشان حکومت، هو وختی کی نافرمانان گوناہ تومام اوشان وجود گیره، ایتا پادشای شرور و خیره سر و زبر و زرنگ به قودرت فارسه. ۲۴ ایتا عالمه قودرت به دس آورده، ولی نه خودش توانایی امره. اون باعیت به کی ویرانیان عظیم ایتفاق دکفه و هر کاری کی کونه موفق به. اون، پيله کسان و قوم موقدس نابود کونه. ۲۵ خو زرنگی امره دوز و کلک زیاد کونه و خوره دیگران جا بوجورتر دانه. بی خبر ایتا عالمه آدم کوشه و حتی (سرور سروران) جُلُو ایسه. سر آخر خودشم نابود به ولی نه اینسان دس امره. ۲۶ اونچی کی او رویا دورون دربارہ یی شبان و صُبان بوگفته بوبوسته حقیقتہ ولی اون مَهر و موم بوکون، چونکی آئندہ یی خیلی دور میان انجام به.»

۲۷ من، دانیال، چن روزی بیحال و ناخوش بوم. بازین ویریشتم بوشوم پادشا کاران انجام بدم ولی رویایی کی بیده بوم مر دیل نیگران کوده چره کی اون مر حالی نوبوسته.

دانیال دوعا

۹ اولی سالی کی داریوش، خشایارشاہ پسر کی نسل ماد جا بو، بابلی یان مملکت پادشا بوبوسته بو ۲ من، دانیال، خدا کلام کی ارمیای نبی الهام بوبوسته بو، بخواندم و بفامستم کی اورشلیم و هفتاد سال ویران بمأنه. ۳ هَن و اسی عزاداری لباس دوکودم، خاکستر می سر فوکودم و ایلتماس و روزه امره می سرور، خدا ورجا دوعا بوکودم. ۴ خوداوند، می خدا ورجا دوعا کونان ايعتراف بوکودم و بوگفتم:

«آی سرور، خودای عظیم و با هییت کی همیشه تی عهد و پیمان اجرا کونی و تی موحبت کسان ره بجا آوری کی تر دوس دأریدی و تی دستور انجام دیهیدی، ۵ امان گوناہ بوکودیم و شرور کاران انجام بدیم. خطا و نافرمانی بوکودیم و تی دستوران و قانونان جا سرپیچی بوکودیم. ۶ پیغمبران تی خدمتگوزاران بید و تی نام امره پادشایان و پيله کسان، امی پئران و تومام مردومان امی سرزیمین امره گب بزه یید، ولی امان گوش نوکودیم.

۷ «آی سرور، عیدالت تی شینه ولی ایمرور امان شرمندیم. امر کی یهودا مردومان و اورشلیم و تومام ايسرائیل شین ایسیم، چی دور و چی نزدیک، آواره کودی چره کی تر وفادار نیسیم. ۸ آی خوداوند، امان و امی پادشایان و پيله کسان و امی پئران تی جُلُو شرمندیم، چونکی تر گوناہ بوکودیم. ۹ تو آی سرور، امی خدا کی بخشنده و مهربانی، هر چند کی امان تی جا نافرمانی بوکودیم. ۱۰ آی خوداوند، امی خدا، تی گبان گوش نوکودیم و تی شریعت به جا ناوردیم، هو شریعتی کی تی خدمتگوزاران ینی پیغمبران دس امره امی جُلُو بنه یی. ۱۱ تومام ايسرائیل مردومان تی شریعت جا نافرمانی بوکودیدی و خوشان روی تی جا و اگر دانه ییدی و تی گبان گوش نوکودیدی. هَن و اسی لعنتان

و قسمانی کی ہوگفتہ بی و تی خدمتگوزار، موسیٰ تورات دورون بینویشتہ بو، امی سر بامو، چونکی به تو گوناہ بوکودیم. ۱۲ تی کلام کی بر ضد امان و امی رهربان ہوگفتہ بی، انجام بدی و او پیلہ دانہ بلائ اورشلیم سر باوردی کی قبل ان تومام آسمان جیر هیکس ره ایتفاق دئنگفتہ بو. ۱۳ آ بلا تومام و کمال، هوطو کی موسیٰ تورات میان بینویشتہ بوبوستہ بو، امی سر بامو. ولی تی فیض طلب نوکودیم تا امی گونایان جا دس بکشیم و به تی حقیقت رو باوریم. ۱۴ هن و اسی خوداوند فوری او بلائ امی سر باورده، چونکی خوداوند، امی خودا کاران همیشه عادلانه ایسه ولی امان اون صدای گوش نوکودیم.

۱۵ «هسا آی سرور، امی خودا، تو تی قودرتمند دس امره تی قوم، مصر جا بیرون باوردی و تی نام مشهور کودی، هطو کی ایمرزم دئن دریم ولی امان گوناہ بوکودیم و شرور کاران انجام بدیم.

۱۶ «آی سرور، هطو کی همیشه عیدالت بجا آوری، تی خشم و غیظ تی شهر اورشلیم و تی موقدس کوه جا و اگر دان چونکی اورشلیم و تی قوم، امی گونایان و امی پثران نافرمانی و اسی، دیگر قومان جلو کی امی دور و ور زندگی کونیدی، روسوا بوبوستید.

۱۷ «هسا آی خودا، کی امی خودا ایسی، تی خادم دوعا و شفاعت گوش بدن. آی سرور، تی فیض و اسی، نور تی روی تی موقدس معبد بتابان کی ویران بوسته. ۱۸ آی خودا، می گبان گوش بدن و می دوعای بیشتا و تی چومان و اکون و امی ویران بوسته شهر کی تی نام اون رو نه، بیدین. امی پارسایی و اسی تر ایلتماس نوکونیمی، بلکی تی رحمت عظیم و اسی، آ خواسته تی جا داریمی. ۱۹ آی سرور، امی دوعای گوش بدن و امر ببخش. آی سرور، امی گبان گوش بوکون و انجام بدن. آی خودا، تی خاطر و اسی دئر نوکون، چره کی تی نام، تی شهر و تی قوم سر نه.»

هفتاد هفته

۲۰ هطو کی دوعا کون دو بوم و می گونایان و می قوم، اسرائیل گونایان ایعتراف کودیم و به حضور خوداوند، می خودا، اون موقدس کوه و اسی ایلتماس کودیم، ۲۱ هو وختی کی غروب دم قوربانی تقدیم کودیدی، جبرئیل کی اون پیشر می رویا میان بیده بوم توند پرواز بوکوده و می ورجا بیجیر بامو ۲۲ و مر ہوگفتہ: «دانیال، هسا من باموم تر آگاهی و فام ببخشم. ۲۳ هو وخت کی دوعا کون دیبی، خودا تی جواب بده و من باموم تر و آخر کونم، چونکی تو خودا ره خیلی عزیزی. هسا آ رویای دق امره گوش بدن تا رویایی کی بیده بی بفامی: ۲۴ هفتاد هفته* تی قوم و تی موقدس شهر ره تعیین بوبوستہ کی نافرمانی و گوناہ تومام به و تفصیر کفاره فاده ببه، پارسایی ابدی برقرار ببه، رویا و پیشگویی مهر و موم ببه و قدس الاقداس* مسح ببه.

۲۵ «تو وادانی و و آخب بیبی کی جہ فرمان دووارة آباد کون اورشلیم، تا امون اون کی خودا مسح بوکوده، هفت هفته و شصت و دو هفته دیگر زمان بره. بازین اورشلیم کوچیان و اون خندق، موصیت زمان میان، دووارة چاکوده به. ۲۶ بعد شصت و دو هفته، او مسح بوبوستہ کوشیدی و هیچی اون ره نمأنه. بازین ایتا پادشا خو لشکریان امره اورشلیم شهر و معبد دورسنه. آخر زمان سیل مانستن آیه و تا آخر جنگ ایدامه پیدا کونه و تعیین بوبوستہ کی ویرانان ایتفاق دکفه. ۲۷ اون،* ایتا عالمه مردومان امره عهد و پیمان یک هفته بی دوده. وختی هفته به نیمه فارسه، قوربانی کون و هدیه فادن جہ میان اوسأنه. بازین او ویرانگر خودا معبد نجست کونه و هرچی کی اون ره مقرر بوبوستہ، سر آخر اون فترکه.»

دانیال رویا دجله روخان ورجا

کوروش، پارس پادشا سومی سال حکومت بو. هو وخت دانیال کی اون «بلطشصرم» دوخوآدیدی، ایتا پیام الهام بوبوستہ بو و آ پیام حقیقت داشتی و ایتا پیلہ دانہ جنگ پیشگویی کودی کی آینده میان ایتفاق دکفه. آ پیام فامستن، رویا میان اون ره آشکار بوسته.

* ۲۴:۹ کتاب موقدس متخصصان اعتقاد دآریدی کی او مدت ۴۹۰ سال طول کشه. * ۲۴:۹ آ صفت متن اصلی دورون تأنه ایتا اینسان یا ایتا مکان ایشاره بوکونه. * ۲۷:۹ آ جمله فاعل کی کلمه «اون» امره نشان بدهیم معلوم نیه کی آیا ایشاره کونه به «او مسح بوبوستہ» یا او «ایتا پادشا».

۲ او روزان دورون، من، دانیال، سه هفته تومام ماتم بیگیفتم^۳ و خوروم خوراک نوخوردم، گوشت و شرابم لب نزم و می سر و کله‌ی فترسم.

۴ بیست و چارمی روز اولی ماه، او پيله روخان ورجا کی اون نام «دجله» بو، به پا ایسه بوم. ۵ وختی بوجور فندرستم، ایدفعه‌یی ایتا مرداکی بیدم کی لیاسی کتان جا دوکوده بو و ایتا کمردود طلای ناب جا دوسته بو. ۶ اون تن، زبرجد مانستن بو و اون دیم صاعقه مانستن درخشه‌یی و اون چومان روشن مشعلان مانستن بو. اون دسان و پایان برنژ تافته مانستن برق زهیی و اون صدا ایتا عالمه مردومان هممه مانستن بو.

۷ من، دانیال تنهایی او رویای بیدم. اوشانی کی می امره بید اون نیده‌بیدی ولی آنقدر ترس اوشان جان دگفته کی فرار بوکودید تا خوشان جیگا بدید. ۸ من تنهایی بسم و او پيله رویای فندرستم. ده مره رمق نمأنسته. می رنگ و رو بیرسته و ده جان ناشتیم. ۹ وختی فرشته گبان بشتاوستم، زمین سر دمر بکفتم و سخت و آخاب شوم.

۱۰ هو لحظه ایتا دس مرم لمس بوکوده و هطویی کی پرکستن دوبوم، مرم چار دس و پا بدأشته. ۱۱ بازین فرشته مرم بوگفته: «ای دانیال، ای عزیز خوداوند، آ گبانی کی تر گفتن درم دقت مرم گوش بدن و ویریز، چره کی هن و آسی تی ورجا اوسه کوده بوبوستم.» وختی آ گبان بزه، هوطو کی می جان پرکستی، به پا بسم.

۱۲ بازین او فرشته مرم بوگفته: «ای دانیال، نوأ ترسن، چره کی جه او اولی روز کی تصمیم بیگیفی کی خواب تعبیر درک بوکونی و تی خودا ورجا فروتن بیی، تی درخواست قوبیل بوبوسته و تی گبان و آسی باموم. ۱۳ ولی پارس مملکت رئیس، بیست و یک روز وناشته بایم تا انکی میکائیل کی ایتا جه پيله فرشته‌یان ایسه، مرم کومک بوکوده، چره کی مجبور بوبوستم اویه پارس پادشایان ورجا بسم. ۱۴ هسا باموم کی تر بگم آینده میان چی تی قوم سر آیه، چونکی آ رویا روزانی شین ایسه کی هنوز و آ بایه.»

۱۵ هطو کی اون، می امره گب زهیی، می سر بیجیر تاودم و لال بوستم. ۱۶ بازین او نفر کی آدمی‌زا مانستن بو می توک لمس بوکوده. پس می دهن و اکودم و گب بزم. من اون کی می جلو به پا ایسه بو بوگفتم: «ای سرور، آ رویا و آسی، درد زیادی تومام می وجود بیگیفته کی ده هیچ حال و رمقی نأرم. ۱۷ ای سرور، چوطویی من کی شیمی نوکرم، تانم تی امره گب بزم در حالی کی می قوت تومام بوسته و سختی امره نفس کشم؟»

۱۸ اونی کی آدمی‌زا مانستن بو دوواره مرم لمس بوکوده و مرم قوت بده ۱۹ و بوگفته: «ای عزیز خودا، نوأ ترسن. سلامتی تی امره بیه، قوی بوبو و قایم بسم.» وختی آ گب بزه، قوت بیگیفتم و اون بوگفتم: «ای سرور، گب بزید، چره کی شومان مرم قوت ببخشه‌بیدی.» ۲۰ اون بوگفته: «دانی چره تی ورجا باموم؟ هسا واکردم کی پارس رئیس امره جنگ بوکونم و وختی بیرون ایم یونان رئیس آیه. ۲۱ هیکس جغیر شیمی فرشته، میکائیل نیسه کی مرم اوشان ضد کومک بوکونه.»

بازین فرشته بوگفته: «اولی سال داریوش مادی* حکومت، من میکائیل ورجا بسم کی اون جا حمایت و محافظت بوکونم.»

۱۱

شومال و جنوب پادشایان

۲ «هسا ایتا حقیقت تر گم: سه‌تا پادشای دیگر، پارس سرزمین دورون ویریزیدی و بازین چارمی پادشا آیه کی تومام اوشان جا خیلی ثروتمندتر به و اون مال و منال باعث به کی اون قودرتمند بیه و همه‌تان، یونان حکومت ضد انتریک* بوکونه. ۳ بازین ایتا پيله پادشا ویریزه و قودرت زیادی امره حکومت کونه و هرچی کی اون دیل خوایه انجام دهه. ۴ ولی وختی در اوج قودرت ایسه، اون حکومت پاشیده به و آسمان چار طرف بادان امره تقسیم به. اون نسل، اون حکومت و اون قودرت ارث نبره، چره کی اون پادشایی ریشه جا بکنده به و دیگران فاده به.

۵ «جنوب پادشا* قوت گیره ولی ایتا جه اون سرداران، پادشا جا قویتر به و قودرت زیادی امره خو سلطنت میان حکمرانی کونه. ۶ چن سالی کی گذره، جنوب پادشا و شومال پادشا* همدیگر امره موحد بیدی. بازین جنوب پادشا دختر شه کی عروسی کودن امره شومال پادشا مرم پیمان دوده ولی او دختر نتانه نفوذی کی پادشا سر داشتی، حفظ بوکونه و او پادشا و اون قودرت دوام نأوره. او دختر، اون پتر، اون همراهان و اونی کی اون جا حمایت کودی تسلیم کونیدی.

۷ «بازین ایتا جہ او دُختر فامیلان پادشا جائی گیره و شومال پادشا لشکر حملہ کونہ، اون قلعہ دورون شہ و اوشان امرہ جنگہ و پیروز بہ. ۸ اون تومامی اوشان خودایان و بُتان و طلائی و نقرہیی ظرفان خو امرہ برہ مصر و چن سالی دہ شومال پادشای ول کونہ. ۹ او وخت شومال پادشا، جنوب پادشا سرزیمین حملہ کونہ، بازین عقب نشینی کونہ و واگردہ خو مملکت. ۱۰ اون پسران جنگ و اسی آمادہ بیدی، ایتا پیلہ دانہ لشکر جم کونیدی و سیل مانستن کی ہیچی نتانہ اون جولودار ببه دووارہ جنگ تا جنوب پادشا قلعہ پیش بریدی.

۱۱ «او وخت جنوب پادشا غیظ امرہ بیرون آہ و شومال پادشا مرہ جنگ کونہ. شومال پادشا ایتا پیلہ دانہ لشکر اوسہ کونہ ولی شکست خورہ. ۱۲ جنوب پادشا پیروزی جا مغرور بہ و دہا ہیزار نفر کوشہ ولی اون پیروزی دوام ناورہ، ۱۳ چرہ کی شومال پادشا ایتا لشکر جم کونہ کی اون اولی لشکر جا پیلہ ترہ و بعد چن سال ایتا پیلہ موجہز لشکر امرہ واگردہ.

۱۴ «او روزان میانی، ایتا عالمہ مردوم، جنوب پادشا ضد ویریزیدی. حتی زورگویان تی قوم جا قیام کونیدی تا او رویا بہ انجام فارسہ ولی موفق نییدی. ۱۵ بازین شومال پادشا آہ، سنگران چاکونہ و او حیصارداژ شہر گیرہ. جنوب لشکریانم نتانید اون جلو بسید، حتی اوشان بہترین سربازانم نتانیدی مقاومت بوکونید. ۱۶ شومال پادشا ہر چی اون دیل خواہ، کونہ و ہیکس نتانہ اون جلو بسہ. اون، قشنگ سرزیمین دورون ایسہ و اقودرت دارہ کی اون ویران کونہ. ۱۷ اون تصمیم گیرہ کی خو تومام حکومت قوت امرہ باہ و جنوب پادشا امرہ ایتا پیمان ڈودہ و ایتا جہ خو دختران اون فادہ تا اون حکومت خراب کونہ ولی موفق نیہ و اون نقشہ شکست خورہ. ۱۸ بازین سرزیمینان ساحلی اون چومان گیرہ و خیلی جہ او سرزیمینان بدس آورہ ولی ایتا سردار لشکر اون گوستاخئی جواب دہہ و خفت و خواری امرہ بیرون کونہ. ۱۹ شومال پادشا واگردہ خو سرزیمین قلعہیان طرف ولی موفق نیہ، شکست خورہ و دہ اثری اون جا نہمانہ.

۲۰ «بازین ایتا پادشای دیگر بہ قودرت فارسہ. اون خو سلطنت شکوہ و اسی ایتا مامور اوسہ کونہ تا مردوم جا باج و خراج فیگیرہ. چن وخت بعد اونم ہلاک بہ ولی نہ مردوم غیظ جا یا جنگ دورون.»

شومال پادشا شرارت

۲۱ بازین فرشتہ بوگفتہ: «ایتا پست فیطرت آدم ویریزہ کی لیاقت سلطنت نارہ ولی ایوارکی آہ و دوز و کلک امرہ سلطنت بہ دس گیرہ. ۲۲ اون، لشکریان و حتی رئیس عہد جہ بین برہ و شکست دہہ. ۲۳ بعد آنکی مردوم امرہ پیمان ڈودہ، اوشان گول زنہ و چن نفر کومک امرہ قودرت بہ دس گیرہ. ۲۴ ایدفعہیی سرزیمینانی کی خوروم محصولان دآریدی حملہ کونہ و اوہ کارانی کونہ کی نہ اون پتر بوکودہ بو، نہ اون اجداد. اون ہر مال و منالی کی زور امرہ فیگیرہ خو پیروان میانی تقسیم کونہ، بازین قلعہیان شکست دتن رہ نقشہ کشہ ولی نقشہ دوام ناورہ.

۲۵ «او وخت دیل و جرأت یافہ و ایتا پیلہ لشکر امرہ جنوب پادشای حملہ کونہ. جنوب پادشایم ایتا پیلہ دانہ لشکر قوی امرہ اون جنگ شہ، ولی اون ضد نقشہیان کشیدی و شکست خورہ. ۲۶ کسان کی اون سفرہ جا خوریدی، تقلا کونیدی کی اون بوکوشید و اون لشکر سیل مانستن بوشوستہ بہ و شہ و خیلی یانم میریدی. ۲۷ ا دوتا پادشا دیل سیا بہ و با آنکی ایتا سفرہ سر نیشینیدی، ہمدیگر دورغ گیدی ولی موفق نییدی، چرہ کی ہو وخت معین ہنوز فترسہ. ۲۸ «بازین شومال پادشا ایتا عالمہ مال و منال امرہ واگردہ خو سرزیمین و ہو را میانی اون دیل ضد کسان کی بہ کی خودا اوشان امرہ عہد موقدس ڈوستہ بو، حملہ کونہ و ہر کاری کی اون دیل خواہ کونہ و بازین خو سرزیمین دورون شہ.

۲۹ «وخت تعیین بوہوستہ میان واگردہ و جنوب سرزیمین حملہ کونہ ولی آ دفعہ، اولی وار امرہ توفیر کونہ. ۳۰ (کتیم) کشتی یان، اون جلو ایسیدی و اون، ترس جا عقب نیشینہ و اون عہد موقدس جا غیظ گیرہ و کسان کی او عہد جا واگردستیدی روی خوش نیشان دہہ.

۳۱ «اَوْن لَشکر، مَعْبَد موقَدَّس و اَوْن قلعہٗ نَجسَت کونید و ونالید دہ ہر روز قوربانی بوکونید و مَعْبَد دورون ایتا نَجسَت بُت نیہیدی. ۳۲ او پادشا، دوز و کلک آمَرہ یوہودیائی کی خوشاں عہد ایشکنیدی خو آمَرہ گومرہ کونہ ولی خودا شناسان اشان کار آمَرہ موخالفت کونید.

۳۳ «قوم حکیمان خیلی یان تعلیم دیہیدی ولی ایتا دوران میان شمشیر آمَرہ میریدی یا آتش دورون تاودہ بیدی یا اسیر و یا غارت بیدی. ۳۴ ولی وختی بکفید، ایچہ کومک اوشان فارسہ. بازین مردومان زیادی دوز و کلک آمَرہ اوشان ہمراہ بیدی. ۳۵ ایتا عیدہ حکیمان کفیدی و اطوی پاک و تیمیز و بی عیب بیدی و ا وضع ایدامہ دارہ تا آخر زمان فارسہ، چرہ کی اَوْن وخت تعیین بوہوستہ.

۳۶ «شومال پادشا ہرچی اَوْن دیل خواہ کونہ. اَوْن خورہ جہ تومام خودایان بوجورتر دانہ و ضد خودای خودایان، عجیب و غریب گب زنہ و ا کاران ایدامہ دہہ تا زمانی کی اَوْن وخت موجازات فارسہ، چرہ کی ہرچی تعیین بوہوستہ، ایتفاق دکفہ. ۳۷ شومال پادشا نہ خو جد خودای محل نہہ و نہ خودایی کی زناکان اَوْن قوبیل دآریدی و نہ ہیچ خودای دیگر کی، چرہ کی خورہ خودایان جا بوجورتر دانہ. ۳۸ اَوْن، او خودایان عوض، او خودایی کی قلعہیان جا محافظت کونہ پرستش کونہ و ہو خودایی رہ کی اَوْن اجداد نشناختیدی، طلا، نقرہ و گیران قیمت سنگان و بارزش پیش کشی یان تقدیم کونہ. ۳۹ ا پادشا خودای بیگانہ کومک آمَرہ قایم قلعہیان حملہ کونہ و قودرت کسان کی اَوْن جا اطاعت کونیدی زیاد کونہ و اوشان مردومان سر جور نہہ و زمینان اوشان میان پاداش و اسی تقسیم کونہ.

۴۰ «آخر سر جنوب پادشا اَوْن حملہ کونہ ولی شومال پادشا خو اراہیان و سواران و ایتا عالمہ کشتی یان آمَرہ گرد باد مانستن اَوْن جلو ایسہ. شومال پادشا سیل مانستن ایتا عالمہ سرزمین حملہ کونہ ۴۱ و قشنگ سرزمین دورون شہ. سرزمینان زیادی اَوْن دس دکفہ ولی آدم و موآب سرزمین و عمونیان پیلہ کسان جیویزیدی. ۴۲ اَوْن، دیگر سرزمینان دس درازی کونہ. مصرم اَوْن دس جا راحت نمائہ. ۴۳ مصر خزانه یان تومام طلا و نقرہ و گیران اسبابان خو ایختیار گیرہ و لیبی و کوش مردومان اَوْن تسلیم بیدی. ۴۴ ولی خبرانی کی شومال و مشرق جا فارسہ اَوْن ترسانہ و غیظ و عصبانیت آمَرہ بیرون شہ تا ایتا عالمہ آدم بوکوشہ و جہ بین برہ. ۴۵ خو شاہانہ چادران کوہ موقدس و زیبا میان کی اَوْن دو طرف دریا نہہ، بر پا کونہ. ولی اَوْن اجل فارسہ و میرہ و ہیکسم اَوْن کومک نوکونہ.»

آخر زمان

۱۲ بازین فرشتہ بوگفتہ: «او وخت میکائیل، او فرشتہٗ عظیم کی تی قوم جا نگہداری کونہ، ویریزہ. بازین موصیتی پیش آیہ کی جہ زمانی کی اولی قوم بوجود بامو تا او روز وجود ناشتی. ہو زمان میان تی قوم نجات یافہ، ینی ہر کی اَوْن نام، کیتاب دورون بامو. ۲ خیلی یانی کی گیل جیر خوفتہ بیدی خواب جا ویریزیدی: بعضی یان زندگی ابدی رہ و بعضی یان دیگر خجالت و شرمندگی ابدی و اسی. ۳ حکیمان، آسمانان نور مانستن تابیدی و کسان کی مردومان عیدالت طرف ہدایت کونیدی تا ابد ستارہ یان مانستن بیدی.»

۴ بازین مَر بوگفتہ: «ولی تو، آی دانیال، ا گبان طومار مہر و موم و لول بوکودہ تا آخر زمان بدار. ایتا عالمہ مردوم ا طرف او طرف شیدی تا اوشان دانایی ویشتر بہ.»

۵ بازین من، دانیال، فندرستم و دو نفر دیگر بیدم کی ایتا، ا طرف روخان و اویتا، او طرف روخان ایسہ بید. ۶ ایتا جہ اوشان، او فرشتہٗ یی کی لباسی کتان جا دوکودہ بو و بوجورتر، روخان ورجا ایسہ بو و اُورسہ: «چقدر طول کشہ تا ا عجیب ایتفاقان تومام بہ؟» ۷ او فرشتہٗ یی کی کتان لباس دوکودہ بو و بوجورتر روخان ورجا ایسہ بو، خو دسان آسمان طرف دراز کودہ و اَوْن صدای بیشتاوستم کی اونی کی جاودانہ ایسہ قسم بوخوردہ و بوگفتہ: «ا ایتفاقان ای زمان، چن زمان و نیم زمان ایدامہ دارہ. وختی کی قوم موقدس قودرت شکست خورہ، ہمہ ا پیشامدان تومام بہ.»

۸ من فرشتہ گبان بیشتاوستم ولی نفامستم اَوْن منظور چیسہ. هن و اسی و اُورسم: «آی سرور، ا چیزان آخر عاقبت چی بہ؟» ۹ فرشتہ بوگفتہ: «آی دانیال، ا گبان طومار تا آخر زمان لول بوکودہ و مہر و موم بہ. پس بوشو و نیگران

نوا بوستن. ۱۰ آدمائ زیادى پاک و تيميز و بى عيب بیدی ولى شرور آدمائ هطو شرارت کونیدی. هیتا جِه اوشان نفامیدی ولى حکیمان فامیدی.

۱۱ «جِه او وختى کى دِه هر روز قوربانى نوکونیدی و او نجست بُت برپا بيه، هيزار و دويست و نود روز گوذره. ۱۲ خوشا بحال اونی کى تا تومام بوستن هيزار و سيصد و سى و پنج روز، رافا ايسه. ۱۳ ولى دانیال، تا آخر ا راي ايدامه بدن کى آرامى يافى، و آخر زمان تى مقرر بوبوسته جاجيگا دورون قرار گیرى.»